



INATSISARTUNI

Partii Inuit
Randi Broberg

UPA 2014/165-1
5.6.2014

PILLUGU: Nunaqarfinni illoqarfinnilu isorliunerusuni ineqarniarnikkut pissutsit ilungersunartut qaangerniarlugit illunik nutaanik kiisalu aserfallassimasunik nutarterinissamik anguniagaqarluni suliaqartoqarnissaa pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Hans Enoksen, Partii Naleraq)

Inoqarfinni isorliunerusuni ittuni ullutsinnut naapertuuttunik inissialiortiternerup annertusarneqarnissaa oqallinnissamik siunnersuutikkut ujartorneqarpoq.

Tassuunakkut inoqarfinni isorliunerusuni inigineqartut ilaatigut aserfallassimasut, ineqarfigineqarnissaminnullu naleqqutinngitsut iliuuseqarfingineqarsinnaaqquillugit.

Taamalu inoqarfinni isorliunerusuni pingaartumik inuuusuttuunerusut akornanni annertuumik inissaaleqineq inuiaqatigiinnik unittoorttsisoq akiorneqarsinnaaqquillugut.

Naalakkersuisut akissuteqaataanni Partii Inuit maluginiarparput, una oqallinneq qujarunneqarmat. Tassani ineqarneq ataatsimut isigalugu misissueqqissaarnerit ingerlasut innersuussutigineqarlutik, taamalu uani oqallinnermi ujartorneqartut isummersuutillu anninneqartut, suleriaqqinnermut tapertaassammata tikuussiviullutillu.

Partii Inuit makkuningga oqaaseqaateqassaagut:

- 1) Inuit inigisaminni namminneq piginnittuusinnaanerat pingaartipparput, tamatumalu annertusarneqartuarnissaa pissusissamisoortutut isigalutigu.

Inuiaqatigiinni ataatsimut pisuussutinut piginnittunngoriartuaarnissatsinnut uiggiukkutsiguttaaq, apeqqut iliuuseqarfingineqanngitsoorsinnaanngitsut ilagaat.
- 2) Inuiattut suli immikkoorutigisinnaasatta ilagaat, pisortanut taakkuluunniit kiffartuussiviinut saaffiginninnissatsinnut tunuarsimaartarnerput. Annermik inuiaqatigiit periarfissiissutaannik ilisimasakinneq atuinissamullu nalornissuteqarneq peqqutigalugit.

Aserfallatsaaliihermut periarfissat eqqarsaatigalugit, Partii Inuit pingaartissavarput pisortat imal. inuiaqatigiit periarfissiissutaat pillugit innuttaasut saaffiginnissuteqarnissaat utaqqiinnangikkaluarlugu, kiffartuussivittut siulliulluni ujartuinikkut iliuuseqartoqartarnissaa.



INATSISARTUNI

Illut inigisat nammineq pigilersimasat assersuutigalugit eqqaaneqarsinnaavoq, ulloq manna tikillugu illunik piginnittorpassuit nalorngissuteqartarmata, maleruaqqusat iluini qanoq periarfissaqarnerlutik.

- 3) Inissialiortiterneq ataatsimut isigalugu Partii Inuit pingaartipparput, sanaartorermik nakkutilliinerup ullumikkumut ingerlanngitsutut taasariaqartup, aaqqiivigineqarnissaa.

Sanaartorermik nakkutilliinerup pingaarutai arlaqarput;

- sanaartukkat sannarlutaanertik peqqutigalugu aserfallakkiartornerat arriillisinneqassamat,
- inigisat pitsaassusaat qulakkeerneqassamat,
- inimik piginnittunut inuiaqatigiinnullu sanaartornerup qaavatigut aningaasartuutaasinnaasut pinngitsoorneqarsinnaammata.

Sanaartorermi nakkutilliineq naammaginartumik aaqqiivigineqartinnagu, aningaasarpas suit ullumikkumut maangaannartarneri unitsinneqarsinnaanngimmat, taamaammat sanaartorermi nakkutilliinerup naammaginartumik ingerlalernissaa pisariaqarluinnarpoq.

- 4) Ukiuni makkunani inissianik aserfallatsaaliineq imal. nutaanik taarsersuinerit ingerlapput.

Ukiorpassuarni najugaqarfisaminniit anisarput, naatsersuutigalugu nutarterineq naammassippat inigisaminnut uteqqissallutik.

Piffissaq kingullerpaaq atorlugu ilisimatinneqartarput, aatsaat inissiamik piginnittuulerunik uteqqissinnaasut. Tassuunakkut inissiat nutaat imal. nutartikkat arsaarinnissutigineqartarput, avataaneersunullu tunineqakkajullutik.

Partii Inuit isitsinni tamanna unneqqaserlunnertut isigaarput– siunissami qaninnerpaami unitsinneqartariaqartoq.

Pissuseq naapertuilluanngittooq tamanna aaqqiivigineqarsinnaavoq, erseqqissumik paassisutissiinikkut periuseqarnikkullu, aammalu inissiamik piginnittuulernissamut aqutissiuinikkut.

- 5) Naggasiullugu Partii Inuit isumaqarpugut, inissianik piginnittungoriartornissarput siunertaralugu, nammineq pigisamik ineqalernissamut aningaasaateqarfimmik pilersitsisoqartariaqartoq.

Aningaasaateqarfiliortoqarsinnaanera periarfissatut iluatigalutigu, Partii Inuit soqtigaarput, tamatuma qanoq sukaterneqarsinnaanera pillugu qulaajaasoqassasortaaq. Oqallisssiamut soqtiginartumut qujanaq.